



**Quæstionum Canonicarum, In Quinque Libros
Decretalium, Tomus ...**

In Librum II. Decretalium, Per Triginta Titulos Distributum, In Quo Agitur
De Judiciis, Foro Competenti, Libelli Oblatione, Mutuis petitionibus, ...

Krimer, Ferdinand

Augustæ Vindelicorum, 1708

Articulus VIII. De probationibus certorum objectorum in specie.

[urn:nbn:de:hbz:466:1-73001](#)

ponitur in narratione; exemplum dant aliqui ex c. si Papa, 10. de Privileg. in 6. ex quo volunt non probari plenè exemptionem, ex verbis rescripti, quo Pontifex incidenter narrat, aliquam Ecclesiam pertinere ad ius, & proprietatem Ecclesiæ Romanæ; quia suam intentionem non fundat super illis narratis, ut notat *gloss. in cit. Clement. unic. V. fecisse narramus.*

1506. Not. 5. quod dicimus per verba Papæ proprii facti narrativa haberi plenam probationem, quando super illis narratis fundat suam intentionem, vi textus procedere solum *in causis beneficialibus, & aliis sua jurisdictioni amplissime subjectis;* adeoq; non in profanis (nisi respectu subditorum temporali ejus potestati subjectorum) nec in his, quæ alieno subdito præjudicium afferunt; nam Pontifex in temporalibus alieni juris nihil disponere directè potest, ut diximus l. 1. *Decret. tit. 2. de Constitut.* ubi non intervenit periculum æternæ salutis, quod cavere, directè, ac jure proprio, pertinet ad summum Pastorem cunctorum Fidelium.

1507. Not. 6. eos, qui volunt verba Pontificis enuntiativa facti proprii, super quo fundat suam intentionem, sic plenam facere probationem, faltem præsumptivè, intelligentes id de præsumptione juris & de jure, quæ scilicet non admittunt probationem in contrarium, hoc limitare, ut intelligatur de *probatione directa;* admittentes probationem contrariam solum *indirectè,* quâ refellatur Papæ narratio, & consequenter dispositio gratiosa super illa fundata; quod tamen intellige, si probatio illa indirecta fiat circa id, quod est *facti;* & non circa dispositionem *juris;* sic *Mascardus de probat. volum. 1. conclus. 139. à n. 18.*

ARTICULUS VIII.

De probationibus certorum objectorum in speie.

1508. Cum probatio fieri debeat circa facta, & quidem incerta, vel quoad substantiam, vel modum, qualitatem, aut aliam circumstantiam in judicium

deductam, & inter litigantes controversam, eamq; probabilem; illæ solum recipiendæ sunt, quæ ad eum finem tendunt, & rejiciendæ impertinentes, aut solum eò tendentes, ut litem prolongent, quo is, qui super possessione v. g. coram Judice conventus est, & valde probabiliter creditur (imo quandoq; scitur) succubiturus in causa, ulterius conservetur. Hæc enim intentio prorsus iniqua est, & à damno alteri ex continuata possessione, sive restituzione, nullatenus excusari potest. Plura porrò in hoc titulo tanguntur in specie, de quorum probationibus actore vel Reo excipiente præstandis decernitur.

Prima quæstio est, an alleganti *etatem*, 1509, in qua fundatur lis partium, in cumbat probatio? hujus quæstionis multiplex occasio est. Nam, ubi aliquid petitur, quod concedi, aut dari non solet, nisi constituto *in etate* jure requisita, si dubium, seu incertum sit, allegantem habere illam, prout jure exigitur, illi onus probationis incumbit. Talis casus controversus habetur in c. *in praesentia, 8. b. t.* ubi, cum inter duos Laicos, & Monasterium ls orta fuisset in causa hæreditatis de bonis Marci nepotis eorum ex Fratre; difficultas erat resolvenda *ex etate Marci.* Nam illi volebant Marci bona sibi deberi, eò quod à Patre suo fuerit gravatus in testamento; ut si sine liberis decederet, bona transirent ad fratres Testatoris superfites; econtra monasterium opponebat, quod Marcus se, & per consequentiam personæ, omnia sua bona obtulerit monasterio, consequenter ea non illis, sed monasterio esse adjudicanda.

Ad hæc illi duo dicebant, eam Marci 1510, dispositionem circa se, & bona sua in monasterium, factam ab illo, dum esset *minor*, consequenter invalidam, adeoq; testamento standum esse: sed Syndicus monasterii duo reponebat i. quod, licet Marcus tempore primæ oblationis fuerit *minor*; & de monasterio rursum egressus sit; tamen deinde iterum, se suaq; bona secundò obtulerit monasterio oblatione etiam juratā; deinde, licet ab illis probaretur

tur fuisse *minor*, per hoc tamen non sufficienter probari defectum *ætatis jure requisitæ* ad hoc, ut talis oblatio non valeret; consequenter Monasterio jure adjudicanda Marci bona, & hoc ab ulteriori eorum impetione absolendum.

1511. His utrinque propositis, Cardinalis Diaconus S. Eustachii, ejus causæ Auditor à Papa constitutus, considerans, quod Syndicus Monasterii intentionem suam plenè probaverit, ex parte verò adversa nihil sufficienter probatum sit, ex mandato Papæ sententiam protulit, duobus prædictis fratribus imponendo silentium super his, quæ à monasterio petebant, eosque ad restitutionem eorum, quæ ex Monasterii bonis, propriâ auctoritate occuparunt, condemnando. Ex hac resolutione colligitur, quando Actor fundat suam intentionem *super defectu ætatis jure requisitæ ad valorem dispositionis*, quam irritam esse propter talem defectum contendit, teneri ad probandum defectum *ætatis*; secus ei silentium ab ulteriore impetione Rei à Judice imponendum, prout factum in praesenti casu, ubi Syndicus Monasterii Marci oblationem quoad se, & bona sua, factam Monasterio, clare probavit; & licet Actores invalidam dicerent, & probarent, quod facta sit, dum offerrens esset *minor*, tamen repulsi sunt, quod probatio *minoris ætatis* non nisi dubia fuerit, de minori *ætate*, seu defectu *ætatis requisitæ* ad validè offendendum se, & bona sua Religioni; ratio hujus redditur, quia *minor* dicitur, & qui est infra annos 14. & qui est infra 25. cùm autem sola minorenitas in primo sensu impedit valorem talis oblationis; non autem in secundo; probatâ solâ *minorenitate in genere*, non habetur probata nullitas oblationis, ut diximus n. 1498.

1512. Not. præterea i. olim eum, qui pubertatem egressus est, potuisse se, ac sua bona valide offerre Monasterio factâ professione, per Authent. *Ingressi. C. de SS. Eccles. c. quia ingredientibus, & c. si qua mulier, 19. q. ult. quamvis*, quantum pertinet ad *ætatem* in professu re quisitam, hodie jure *Triad. Sess. 25. de*

Regul. c. 15. exigatur annus *ætatis* decimus sextus completus. Quare monasterium, si propter bona Professi in ipsum translata impugnetur, Actor contendente professum disposuisse cum defectu *ætatis* ad ejus valorem de jure requisitæ, v.g. dispositione facta ab impubere; sufficienter ac plenè probat *ætatem* ad valorem dispositionis, si probet professionem factam; ex hoc ipso enim probatur *ætas legitima* ad talem actum jure requisita; adeoque non defuisse *ætatem* juridicam, cùm ab ipso professo fieret Religioni oblatio sui, ac suorum bonorum; & ideo in casu cit. c. Syndicus Monasterii, oblationem cum requifita *ætate* juridica factam esse ritè probatur, intentionem suam fundavit super facta professione; ex hoc ipso enim satis probavit, non esse factam cum defectu *ætatis* ad ejus valorem necessariæ, nimirum infra pubertatem, cùm in ea *ætate* profiteri non potuerit.

1513. Not. 2. probari *ætatem*, vel verè, vel præsumptivè; verè probatur exhibendo tempus nativitatis, v.g. per legitimos testes, qui deponant, se scire tali anno, die, natum, à se post nativitatem infantem ex baptismo levatum, vel Parochi testimonio deponentis à se baptizatum, &c. præsumptivè autem per conjecturas, id, quod pluribus dicemus tit. 23. de Præsumptionibus. Cœterū cùm non obstante clausulâ testamenti, quā Marcus à Patre suo jussus est bona sua transmittere ad Testatoris Fratres superstites, si deceperit sine liberis, oblatio facta Monasterio per sententiam Papæ definitivam approbata fuerit exclusis illi substitutis sub dicta clausula, rectè sequitur, gravatum, si sine liberis deceperit, non censi gravatum pro casu, quo in Religione divino se obsequio per religiosam professionem mancipat, ut fusè probat Thomas Sanchez l. 7. moral. c. 16. à n. 4. eo, quod jure præsumatur, Testatorem, favore Religionis, & divini cultûs per Dei servitium, quo salutem animæ certiore fibi reddit filius, ad hunc casum dictam clausulam non extendisse, id, quod pluribus ex

ex utroque jure demonstrat Sanchez; ubi tamen excipi debet, nisi substituta sit alia causa pia, quæ gaudet jure posteriori, in Dei cultu fundata.

1514. Altera quæstio est de probatione *Virginitatis*, quæ variis subinde casibus præstanta sit, ut si mulier reclamet contra impotentiam Viri, allegans se ab illo nec cognitam, nec cognosci potuisse, etiam sæpius attentatâ matrimonii consummatione. Casus habetur in *c. Proposuisti*, 4. b. t. ubi, cùm causa matrimonialis inter Ottонem de Casa nova, & Sobrinam mulierem, à Gregorio VIII. delegata erat Præposito S. Cataldi, coram eo partibus constitutis, mulier allegavit Viri impotentiam, juramento eam confirmans, & septem mulierum testimonio, quæ de ejus Virginitate, ex aspectu testabantur; sed Vir contrarium juratus asseveravit. Super hac re consultus Pontifex respondit; *juramento puellæ, & septem mulierum testimonio potius fidem habendam esse*. Ex hac decisione deducitur, etiam contra unius juramentum prævalere testimonium plurimum, in materia controversa peritorum, contrarium deponentium (hi enim faciunt plenam probationem; unius autem juramentum, duntaxat semiplenam) & rem in judicio dubiam recte probari depositionibus eorum, qui ex inspectione oculari de materia, vel re determinate deponant, si periti sint, in cognoscendo, seu judicando, an sit, vel non sit in tali materia? de qua litigatur.

1515. Nec obstat dici in *c. continebatur*, 6. de *desponsat. impub.* Viro cum juramento afferenti, Uxorem esse à se cognitam; id, quod etiam habetur in 3. q. 3. c. *si quis 3.* cuius ratio redditur, id dicendum propterea, quòd in talibus, quæ difficilis probationis sunt, major certitudo requiri non soleat, & Viro, qui est caput mulieris, potius credendum sit: Resp. enim talem assertionem refelli posse, si septem mulieres ex aspectu de virginitate testificantur, uti hic & *c. causam*, 14. junct. gloss. *V. mulieres*, b. t. Quoniam autem plerumque dicitur, litem censeri dicisam, si una pars litigantium juramentum præ-

stitit; dicendum est, id procedere in casu, quo Actor cum consensu Judicis Reo derulit juramentum, si non vertatur periculum animæ, prout fieret in casu matrimoniali, quo mulier perpetuò vivere deberet cum impotente; nam in eo casu juramentum haberet vim transactionis, inducentis plenam litis decisionem *arg. L. admonendi*, 31. ff. *de jurejurand.* secus autem est de juramento uni litigantium delato à Judice; nam in hoc casu alteri non adimitur jus probandi contrarium ei, super quo juratum est, per *L. cùm de indebito*, 25. ff. *de probat.* & aperte colligitur ex relata decisione in *c. proposuisti*; in mutuis enim petitionibus (seclusâ partium transactione, quam importat delatio juramenti facta uni parti ab altera) prævalere debet ea, quæ potentior est.

Alter casus in hac materia habetur in *c. causam*, 14. b. t. Puella enim quædam matrimonium contraxerat cum juvene, sed post nuptias recessit, & monasterium ingressa professionem edidit, asseverans, se Virginem mansisse; sed juvenis eam repetebat, allegans, quòd matrimonium cum ipsa consummârit. Cùm autem super hoc consultus esset Pontifex Honorius III. rescripsit, ut puella interim in Monasterio secura permaneat, donec judicialis sententia lata fuerit; & ut judices delegati ex utraque parte probationes recipiant; & specialiter, si vir opponere velit contra mulieres de Virginitate puellæ testificantes, super hoc audiatur; deinde cùm obstetricum judicia quandoque fallant, ideo præter mulieres modò adhibitas, aliæ adhuc honestæ ac providæ Matronæ adhibeantur, quæ de Virginitatis privilegio testimonium dent. Ex hac resolutione deducitur. I. integritatem corporis in muliere recte probari per matronas, in hac re peritas, & bona fama, quæ deponant, puellam (agentem ad separationem matrimonii propter impotentiam Viri, vel se matrimonio non consummato ingressam monasterium) adhuc esse Virginem; dixi bona fama, ut habetur in textu, ibi, honestas matronas, provides, quo notatur, quòd matronæ debeat esse artis peritæ, honestæ, ac bona

bonæ famæ, non leves ac viles, ne modico pretio subornatae falso deponant; Sanchez l.7. matr. D. 113. à n.1. hinc quandoque etiam vel ipsæ, vel illarum attestations possunt reprobari à Viro per alias probationes (ibi: *si vir oppone-re velit contra mulieres*) quæ sunt recipienda, cùm obstetricum judicia quandoque fallant; quo casu adhuc alia honestæ, ac providæ matronæ adhibenda sunt, quæ de Virginitatis privilegio testimonium dent; sufficit autem, quòd deponant *de credulitate*; sic Layman *in cit. c. causam, n.2.*

1517. Speciale tamen est in hoc c. quòd Viro Uxorem, quæ proprio motu discessit, in judico repetenti (cùm constaret de nuptiis inter eos initis) non fuerit restitutio facta, sed iusta in monasterio remanere, dum lis finiretur; cùm tamen agenti interdicto retinendæ, tanquam spoliato ante omnia restitutio facienda sit, ut dicitur *c. ex transmissa, 8. & c. ex parte, 14. de restitu-tut. spoliat.* Resp. ut decisio in postremo citatis juribus locum habeat, requiri, quòd prius constet de spoliatione facta, quām definiatur pro restituzione facienda; hinc repetens id, quo se spoliatum dicit, prius probare debet *spoliationem*, id, quod in præsenti Juvenis eam repetens non præsttit. Ex eo enim, quòd mulier nondum à Viro cognita recedat à Viro, & ingrediatur Monasterium, animo profitendi, vel etiam emiserit professionem, non *spoliavit* Virum, negando illi, quod *jure* debitum est; cùm gaudeat jure sibi concessio, etiam celebratis nuptiis, sed nondum consummatis, Religionem intrandi, ac in ea profitendi, etiam in-vito Viro, ut diximus l.4.

1518. Tertia quæstio est, qualiter probanda sit *filiatio*? difficultas est quoad *Patrem*; mater enim semper certa est; sedan prolem, quam enixa est, suscep-rit ex hoc, vel illo Viro, per frequenter valde incertum est; & ideo quoad *Patrem* probatio filiationis est regulariter difficilis; consequenter solum fieri potest per præsumptiones, seu probabiles conjecturas, ut recte observat Menochius *de arbitrar. Judic. casu 89. à n.3.* quæstio igitur est i. an recte probetur, saltem præsumptiuè, *filiatio ex eo*, quòd

quis fuerit educatus in domo alicujus? 2. ex confessione, & nominatione parentum? 3. ex sola confessione Patris, vel Matris, dicentis, hunc esse filium suum? sed ad hæc respondimus l.4. & ad 1. negativè ibi à n.1476. ex c. *Trans-missa, 3. qui filii sint legitimi;* ad 2. ibid. n.1479. diximus affirmative, quando confessioni parentum propter se factæ accedunt alia indicia; ad 3. ibid. n.1481. respondi negativè; intellige, seclusis aliis adminiculis.

Alii ponunt triplicem casum, ex quo præsumptivè probetur filiatio; pri-mum desumunt ex L. *filium 6. ff. de his, qui sibi, vel alieni:* si quis natus sit ex uxore in domo mariti cum ea cohabitantis, & potentis generare; quod pro-cedere volunt, esto constaret, Matrem eodem tempore adulterium cum alio commisisse, modo etiam Vir ei copu-latus sit, probantes hoc ex L. *miles, 11. ff. ad L. Jul. de adulteriis, §. defuncto;* verum hæc probatio non sufficit, cum solum dicat, fieri posse, quòd non ob-stante copulâ adulterinâ, filius natus sit ex copula Viri legitimi; rectius probatur exinde, quòd in dubio pro-nunciandum sit pro favore matrimo-nii, & liberorum: hæc enim causa fa-vorabilis est; sicut enim nativitas ex matrimonio, quamvis præstet præ-sumptionem *solius juris*; non autem e-tiam *de jure*: similiter jus præsumit filium eorum, inter quos extat matrimo-nium, esto fortassis unus conjugum, v.g. mater neget illum suscep-tum à marito; vel pater, esse à se, qui aper suum asser-tum, nisi hoc aliunde probent, non pos-sunt præjudicare favori, quem juris præ-sumptione habet nativitas ex conjugio. V. *Sylvest. V. Adulterium, in Summa.*

1519. Alter casus est, si quis ab aliquo *filius* appellatus, & ab eo tanquam *filius* habi-tus, & tractatus fuit; ex hoc enim con-stituitur in quasi possessione filiationis; nec dejici debet, nisi contrarium pro-betur; id, quod deduci videtur ex c. *Pertuas, 10. de probat.* de quo tamen vi-deri possunt dicta l.4. à n.1476, & 2446. Ex quo vides aliud esse, quòd quis pro-betur filius ex *sola educatione*, vel ex *sola nominatione* alicujus; aliud si hæc *conjugantur*. Tertius casus desumitur ex communi fama; sed de hoc V. *dicta*

à n. 1449. Illud etiam hic addendum ex Barbosa in cit. c. per tuas, n. 3 similitudinem prolis, quam quoad oris, & vultus apparentiam refert cum adultero suæ matris (si constet hanc sub idem tempus Viro suo copulatam esse) non præstare conjecturam probabilem contra juris præsumptionem de talis prolis nativitate ex matrimonio, seu legitimo patre; cùm sit perquam fallax, & incerta.

1520. Quarta demum quæstio est, qualiter probentur *confinia*, seu *limites locorum*? de hoc agitur in c. *Causam 13. b.t.* ubi quærentibus super hac materiæ respondit Honorius III. Mandamus, quatenus secundum divisiones, quæ per libros antiquos vel alio modo melius probantur, nec non testes, famam, & quæcunque alia adminicula hoc negotio procedatis. Ex quo sequitur, limitum probationem rectè fieri 1. per antiquas scripturas; 2. per testes; 3. per famam, & alia adminicula: de probatione per famam diximus à n. 1446. de probatione per testes agetur tit. *sequenti*. de scripturis. tit. 22.

ARTICULUS IX.

Quam probationem faciant literæ Judicis ordinarii, vel alicuius Communitalis?

1521. L^oquimur de Judice ordinario, non supremo, sed inferiore; circa hanc quæstionem 1. aliquid habetur in c. *post cessionem 7. b.t.* Cùm enim Innocentio III. ex literis Judicis ordinarii constitisset, quòd Vitus excommunicatus fuerat, quando Procuratoris officium assumpsit, ipsum tanquam Procuratorem in judicio recipere noluit; causam autem, propter quam illis literis Pontifex fidem habuit, ibidem additur: *quia ipsis credendum est, donec contrarium probetur.* Ex quo rectè sequitur, fidem habendam esse literis Ordinarii, *debitè* (nimirum sigillo, vel subscriptione) munitis. Hinc autem quæstio nascitur, an sigillum literis appositum, fidem, seu probationem faciat? sed de his V. tit. de fide instrumentorum. Coeterum decisio, quæ habetur in dicto c. *post cessionem* (nimirum, quòd literæ Episcopi, vel alterius Judicis ordinarii sigillo, vel subscriptione munitæ, faciant plenam fidem etiam in præjudici-

um alterius) intelligenda venit, quando agitur de modico præjudicio, ut fuit in casu dicti c. secus est, ubi continerent præjudicium grave, v.g. promulgationem excommunicationis, vel cassationem electionis &c. sic Abbas in cit. c. *post cessionem*, n. 6. & post illum Pirbing. b. t. n. 56.

Quæstio altera de literis Communitatis, Collegii, vel Monasterii agitur c. *Tertio 5. b.t.* Cùm enim quidam Canonicus Regularis amico suo sub sigillo Conventūs alienationem fecisset rerum Ecclesiæ immobilium, & hoc instrumentum exhibitum esset in judicio; Procurator Monasterii dixit, non esse cum Conventūs consensu constitutum, atque sigillum adulterinum vel furtivum esse, & cùm ad hoc probandum introduxisset Fratres, qui jurati dixerunt, quotiescumque de hac alienatione mentio facta fuit, Conventum contradixisse; pars autem contraria adversus hæc testimonia nihil probasset; Clemens III. rescripsit, secundum dicta testimonia fratrum, esse judicandum. Ex hac decisione deducitur 1. quòd excipiens contra instrumentum, in judicio productum (Opponendo, si gillum esse adulterinum, aut furto sublatum) ad hoc probandum per testes, admitti debeat, ut colligitur ex cit. c. 7. b. t. & c. *Joannes*, 10. de fide instrumentum non tantum exceptionem probando directe; sed etiam indirecte, ut si probet Capitulum nunquam consensisse in id, quod continet instrumentum, munitum sigillo Communitatis. Deducitur 2. Clericos in causa suæ Ecclesiæ, vel Monachos in causa sui Monasterii, posse testes esse; prout clare probatur ex casu dicti c. *Tertio*; etiam si deponant in ejus commodum, si testentur super factum, vel non factum, ab eis collegialiter, & procedant ut personæ singulares. Etsi enim propter interesse sint aliquantum suspecti, quod membra habent cum conjunctione totius; quia tamen ea, quæ capitulariter aguntur in Capitulo, per extraneos (cùm non admittantur) probari non possunt, necessariò admittendi sunt ii, qui in Capitulo adfuerunt, ne illis negetur via defensionis justæ.

ARTI-